

疆
邦
華
夏

西平樂慢 西湖先賢堂

武林舊事先賢堂名仰高祠許由以下共四十人刻石作贊具載事蹟中有振衣古香清風堂山亭流芳花竹縈紆小山曲徑今歸旌德觀

瑞龍吟 蓬萊閣

輿地紀勝紹興郡治在臥龍山上蓬萊閣在郡設廳後取元微之謫居猶得近蓬萊句也 會稽志張伯玉州宅詩序云越守王工部至和中新葺蓬萊閣成畫圖來乞詩工部乃王達也

又 德清清明競渡

周學濬湖州府志唐天授二年分武康東境十七鄉

置武源縣景雲二年改名臨溪天寶元年改名德清
按歲時廣記引越地傳云競渡起於越王句踐殆
習之以爲水戰者荆楚歲時記亦云南方競渡者治
其舟使輕利謂之飛鳧蓋競渡之俗在荆楚以五月
五日爲弔屈原在越俗則以春水方生便於水事流
傳爲清明水嬉故實吳郡志競渡亦用清明寒食是
其證也

浣溪沙 履翁

絕妙好詞箋吳潛字毅夫號履齋甯國人嘉定十年
進士弟一淳祐中觀文殿大學士封慶國公改封許
國公景定初安置循州卒贈少師有履齋詩餘三卷

又 承天

吳郡志能仁禪寺在長洲縣西北二里卽梁重平寺
入國朝爲承天寺 按蘇州府盧志載元黃潛平江
承天能仁寺記云平江承天能仁寺在府署北之甘
節坊梁天監初衛尉卿陸公僧瓚捨宅以建也大中
祥符初始賜額曰承天宣和中乃改其額曰能仁曰
承天能仁者並存其故也故集中採芳新題承天寺
而鐵網珊瑚載夢窗墨蹟作能仁寺

又 琴川慧日寺

馮桂芬蘇州府志常熟琴川橫港七派如琴絃然嘉
熙初王燭增闢榜曰琴川 盧熊蘇州府志慧日禪

寺在常熟縣治北九十步梁吳僧慧嚮建 按馮志
又云寺梁天監閒建宋舊名壽聖又名安安大中祥
符元年敕爲慧日禪院

醉桃源 豐樂樓

咸淳臨安志豐樂樓在豐豫門外舊名聳翠樓據西
湖之會千峰連環一碧萬頃爲遊覽最願以官酤喧
雜樓亦卑小弗與景稱咸淳九年趙安撫與憲始撤
新之瑰麗宏特高切雲漢遂爲西湖之壯縉紳多聚
拜於此 武林舊事豐樂樓舊爲眾樂亭又改聳翠
樓政和中改今名淳祐閒趙京尹與憲重建宏麗爲
湖山冠吳夢窗嘗大書所作鶯啼序於壁一時爲人

傳誦

望江南 靈照女

傳燈錄襄州居士龐蘊一女名靈照居士將入滅令女靈照出視日早晚及午以報女遽報曰日已中矣而有蝕也居士出戶觀次靈照卽登父座合掌坐亡居士笑曰我女鋒捷矣

賀新郎 德清趙令君小垂虹

按德清縣志南宋知縣趙伯搏嘉定六年任趙善春嘉定十七年任令君未知孰是又小虹橋在縣東疑卽小垂虹

婆羅門引 懷甯

宋史地理志淮南西路安慶府縣五懷甯上

又郭清華

按集中花犯郭希道送水仙詞有清華池晚語清華
疑卽希道

祝英臺近得趣

按得趣居士周氏見陽春白雪集中高山流水題云
丁基仲側室善絲桐賦詠曉達音呂備歌舞之妙陽
春白雪有得趣和基仲瑞鶴仙詞基仲有水龍吟見
絕妙好詞卽悼得趣之作

又龜谿

德清縣志龜谿古名孔愉澤卽餘不谿之上流也昔

孔愉微時常經谿上見漁者籠一白龜買而放之中
流龜左顧數四而沒

西子妝慢

山中白雲西子妝慢序吳夢窗自製此曲余喜其聲
調妍雅久欲述之而未能甲午春寓羅江與羅景良
野遊江上綠陰芳草景況離離因填此解惜舊譜零
落不能倚聲而歌也

夢芙蓉 趙昌

聖朝名畫評趙昌劒南人性傲易雖遇彊勢亦不肯
下之善畫花果初師滕昌祐後過其藝 宣和畫譜
趙昌字昌之工畫花果作折枝大有生意

霜花腴

按蘋洲漁笛譜有玉漏遲題吳夢窗霜花腴詞集山中白雲有聲聲慢題夢窗自度曲霜花腴卷後意當時此曲盛傳遂以標其詞卷也

澡蘭香 淮安

宋史地理志淮南東路南渡後州九揚楚海泰泗滁淮安眞通紹定元年升山陽縣爲淮安軍端平元年改軍爲淮安州

鳳池吟 梅津除右司郎官

按咸淳臨安志秩官門兩浙轉運名氏尹煥下注淳祐六年運判七年除左司則此詞淳祐七年作也特

左右異耳

暗香

魏句濱宰吳縣解組

按陽春白雪魏句濱名庭王蘇州府馮志吳令魏庭
玉宛陵人嘉熙四年任又甯國志句溪在府城東源
出歙之叢山魏爲宛陵人故取以爲號 又按蘇州
府盧志官宇門吳縣縣門淳祐三年魏廷玉修飾尤
爲壯麗又知縣廳東有勤清堂魏廷玉建故祠有妙
手作新公館青紅語又學校門云吳縣學嘉熙四年
知縣魏廷玉主學孔晧始爲修葺知廷玉任吳縣在
嘉熙四年前其解組在淳祐三年後矣

念奴嬌

德清縣圃明秀亭

德清縣志明秀亭周植桃與海棠榜曰紅雲塢在縣
治後圃

惜紅衣 從姜石帚遊茗雪閒三十五年

按蘋洲漁笛譜拜星月慢敘稱作於景定癸亥草窗
詞別題爲寄夢窗劉毓崧據爲夢窗此年尙在而白
石詞刻在嘉泰壬戌下距景定癸亥已逾六十年其
寓吳興又在嘉泰壬戌前十二年則景定癸亥年
已八九十其從遊時代惜無可徵實矣

江南好 時齋

按集中有聲聲慢和沈時齋八日登高詞 四庫提
要樂府指迷一卷沈義父撰字伯時翁大年刊本跋

曰時齋震澤人嘉熙元年以賦領鄉薦爲南康軍白鹿洞書院山長致仕講學學者稱時齋先生著時齋集遺世頌樂府指迷

水調歌頭

魏方泉

癸辛雜識魏峻字叔高號方泉娶趙氏乃穆陵親姊四郡主也

洞仙歌

方庵

花翁

按集中木蘭花慢遊虎北詞題云李方庵將滿秩蓋亦官吳中者劉克莊孫花翁墓誌季蕃貫開封少受祖澤調監當不樂棄去始昏於婺後去婺遊留蘇杭最久其倚聲度曲公瑾之妙直齋書錄解題花

翁集一卷開封孫惟信季蕃撰在江湖中頗有標致
多見前輩多聞舊事善雅談長短句尤工

秋思 括蒼

方輿記括蒼山在台州府城西南周三百里

江神子 朔翁

齊東野語劉震孫字長卿號朔齋嘗爲宛陵令與吳
穀夫唱酬 按汲古閣本夢窗丁稿有滿江紅和劉
朔齋詞朔翁疑卽朔齋

又 翁五峰

絕妙好詞箋翁孟寅字賓陽號五峰錢塘人 四朝
聞見錄翁中丞彥國建之崇安人子謙之進士孫孟

寅嘗首臨安鄉薦

驚啼序 豐樂樓

汲古閣本注云節齋新建此樓夢窗淳祐十一年二月甲子作是詞大書於壁望幸焉 宋詩紀事趙與憲字德淵號節齋太祖十世孫理宗朝歷官吏部尙書兼知臨安府終淮浙發運使知平江府致仕 按自號錄趙與憲號節齋淳祐九年十一月與憲爲資政殿學士提領國用浙西安撫使見宋史理宗紀

玉漏遲 瓜涇

王鏊姑蘇長洲縣村一百四瓜涇在三十一都蘇州府馮志瓜涇港在吳江縣北九里分太湖支流

東北出夾浦會吳淞江

永遇樂 乙巳

按乙巳爲理宗淳祐五年

玉胡蝶

按是詞用柳永韻

絳都春 李太博赴括蒼別駕

癸辛雜識別集李伯玉字純甫乙未殿試第三人當
史嵩之柄國時爲太學博士上疏援章李二臺官以
此大得聲譽未幾爲陳劾去又史嵩之始末條云嵩
之父彌忠殂於家及丙午冬終喪御筆史嵩之候服
闋日除職與宮觀於是臺臣章瑒李昂英及學校皆

有書疏交攻之太博李伯玉亦上疏力爭疑此李太博卽伯玉其爲括蒼別駕正援章李被劾時也

又 履翁帥越

宋史理宗紀淳祐九年八月以吳潛爲資政殿學士知紹興府浙東安撫使按是年十二月以潛同知樞密院事兼參知政事是詞賦上元景物疑爲次年正月作

又 李篋房

古今詞話李彭老字商隱有篋房詞 景定建康志彭老淳祐中沿江制置司屬官

惜秋華 飛翼樓

詩家鼎鑪王邁飛翼樓詩亭前一望海東流更有雄
樓在上頭燕子飛來春漠漠鴟夷仙去水悠悠題注
云舊傳說范蠡故址

又 鹽官

宋史地理志兩浙路臨安府縣九鹽官上紹興中升
畿

又 大曲六么王子高芙蓉城事

雲麓漫鈔王迥字子高舊有周瓊姬事胡徽之爲作
傳或用其傳作六么武林舊事載官本雜劇段數有
王子高六么是也

惜黃花慢 吳江